

榆次縣志卷之七

古蹟

榆次古城 舊志云在今縣城北周二十一里漢時築餘址猶存

中都故城 舊志云在縣東一十五里漢置縣一名內都城今考合流村西南老孤崖舊傳有城按舊志及省志並引左傳魯昭公八年晉執陳無宇於中都謂卽此中都殆恐不然春秋時齊都臨淄晉都絳無宇送女而往來自當

榆次縣志

卷七

古蹟

一

歷魯衛鄭地以至晉以今輿地言之則由東昌開封懷慶涉河以達於晉道坦而近使車所宜何事迂遠迴曲踰太行之險返北出晉國之背而南驚乎雖古今相距而準事揆勢殆決然勿疑者意傳所謂中都卽晉之國都當時自有此稱如孔子治中都在曲阜卽魯君所都故謂之中都者是矣晉旣遷絳以曲沃爲下國見左傳僖公十年曲沃旣爲下國則公所居自爲中都此又其明証也方無宇

送女於晉館於晉都未及行而執焉傳故云
執無宇於中都義本甚明如但見有中都之
文而卽指謂乃此中都可乎

武觀城 舊志云在縣西南二十里陳侃村北一
名武館城他書或作五觀武與五觀與館者音
近相訛矣水經云洞渦水至武觀城而北晉盧
諶征艱賦云徑武觀之故郭問厥途之遠近諶
爲劉琨并州從事正經其地也今無跡

舊志與省志古跡並載武觀城然不詳其所

榆次縣志

卷七

古蹟

二

出按竹書紀年王放武觀於西河又曰武觀
以西河叛又曰武觀來歸武觀王弟也乃夏
啟時事或曰其弟有五故謂之五觀武觀城
正其遺處

鑿臺 舊志云在縣南郭村史記韓魏趙殺智伯
鑿臺之下後爲洞渦水所沒址微存省志曰一
曰鑿壺今無跡

按壺卽臺蓋昔人傳寫之誤

信都城 舊志云在縣東十八里宋圖經縣東鄉

常名信都今改來暮鄉是也

龐涓洞 舊志云在縣北二十五里蘇村南澗河
厓上世傳涓常居此習兵法今洞存人不敢入
廢臺 舊志云在縣東五十里張平村相傳石虎
時冉閔爲并州刺史常置臺壁以禦秦寇今無
跡

長寧壁 舊志云在縣東十里北魏李長寧居此
後改長寧寨今考其地有元和觀觀東北厓上
乃昔人避兵處雖壁寨已盡毀而地道猶存

榆次縣志

卷七

古蹟

三

區堂壁 舊志云在縣東南三十里北魏傅區堂
居此後改福堂村寨內鑿窰數穴樹木叢茂形
勢險阻可以避兵今尚存在村東道場溝內
洞渦府 舊志云在縣東八里源渦村又長寧村
有長寧府皆唐貞觀中建以居府兵者

按唐時太原置府十八榆次有其二省志無
鐵冶 在縣北五十里陰山下鐵冶溝古出鐵鑛
宋時常於此置冶今巨石堆壘遺蹟尚存

鬪雞堆 在西郝村東南三里續志傳爲宋太宗

鬪雞處

按此非宋太宗事史稱後唐莊宗好鬪雞莊宗與梁戰數引兵過此是其遺跡誤傳爲宋宗耳

思政堂 舊志云在縣治東宋宣和初知縣事李諒築今無址

重源寨 金末守將趙益築此屯兵以與元人戰謀復太原府者今爲崇元村土人稱崇元府有

校場遺跡掘地時得箭鏃

崇元重源音近相訛

榆次縣志

卷七

古蹟

四

採風亭 在城北邑厲壇東明知縣俞鸞建環階植檜栢蒼翠可挹

勸農亭 在郭南門外亦俞鸞所建今二亭俱廢植栢亦盡唯址存焉

舊志古跡十有五其見於史書者八曰榆次古城中都城信都城武觀城鑿臺廢臺洞渦府鐵冶其不見於書而傳聞足採者三曰龐涓洞曰長寧壁曰區堂壁其雜出於俚俗所稱而無取者四曰藺交馬喊坡晾馬臺土井

續志可採者一曰鬪雞堆其悠繆無稽尤莫若孟母之故宅矣省志因之且有所謂斷機堂者是信业里之言爲傳記也今削藺交而下以歸於雜志若思政堂重源寨採風亭勸農亭跡不可使泯者則補入焉省志又有金家樓考之元末有金元帥者駐此起樓臺城內後貨於寇氏改爲蘭坡精舍寇市於周周市於齊樓雖廢而其名則至今稱如故也不以列古蹟舊志得之

塚墓附

周智伯墓 舊志云在縣東南三十里其地爲神頭村今名存而墓不可考矣

北魏左僕射郭祚墓 舊志云在縣東八里源渦村今有大壟尚存

東魏龍驤將軍杜何拔墓 舊志云在縣東南鹿蹄山今考在麓臺村西北三里許尚存

舊志作梁杜何拔墓非

北齊白顯墓 舊志云在縣東北二十五里要店

村墓前有石羊二碑刻磨滅今存

北齊司徒中書令韓軌墓 舊志云在縣東北四十里韓村寨北二里許傍有四塚不知爲誰今存

北齊可朱渾元墓 舊志云在縣東八里源渦村今不知處

北齊祁丞相墓 舊志云在縣之西祁村有碑剝今微址存

唐太保李良臣墓

榆次縣志

卷七

古蹟

六

唐節度使李光進墓

唐太尉李光顏墓 三墓並在縣北十里趙村良臣墓其中光進居右光顏居左李宗閔令狐楚李程所撰神道碑三通尚岬樹於外文字完好可摹初良臣碑已折康熙中署縣事洪璟使人合之而覆以亭其二碑則乾隆十四年里人闔繩武等復建亭爲護知縣錢之 記之

唐金州司馬張行墓 舊志云在縣古城北今失唐郝忠墓 舊志云在西塢村西南一里許今存

舊志自戰國至唐有白起墓冉閔墓單雄信墓夫起以不肯復將兵伐趙忤秦王秦王遷之陰密使爲士伍又賜杜郵之劍何自而葬此白氏譜云秦思起功封其子仲於太原殆起之後有葬焉者而人遂以起當之耳若冉閔爲慕容儁斬於龍城雄信當唐太宗破王世克時斬洛水上又何自葬此府志云唐游擊將軍單雄信其言游擊將軍則得之言雄信則失之是蓋唐時有爲游擊將軍單姓者

榆次縣志

卷七

古蹟

七

所葬而雄信以劇盜有名爲俗人所知因附會指之閔與雄信雖真塚法猶不得書况其無實哉

五代樞密使趙玘璠墓 舊志云在郭村今存按舊志以爲玘璠後魏人官至樞密使是未知樞密之稱始於唐末宦官後魏安得此官耶璠蓋後五代周臣耳其官贈太師

宋王府君墓 在三徙鄉郭社里誌銘尚完舊志逸

元登封尉杜懷玉墓 舊志云在縣北中杜村西

南半里許

元教授胡巨源墓 舊志云在縣南三十里庄子

村

元平晉尹康庸墓 舊志云在縣龍白村北十里

許墓前有石獸四石人二石柱二石碑一刻曰

承事郎冀寧路平晉縣尹管本縣諸軍奧魯勸

農事康庸之墓至正七年二月立石上三塚並

存

榆次縣志

卷七

古蹟

八

元贈清源尹孟祥墓 舊志云在福堂村南一里

翁仲猶存

明晉端王墓 在岡頭村西南

明晉簡王墓 在岡頭村西

明晉藩新化恭裕王墓 在蘇村西北

省志云明端王簡王敬王墓並在縣北三十里

駝山今考駝山在太原榆次無是省志非

按明高皇帝第三子櫛封晉王國太原是爲

晉恭王恭王薨子定王濟熿嗣定王薨子憲

王美圭嗣憲王薨庶長子莊王鍾 嗣莊王
世子竒源與源子表榮皆前死及王薨以表
榮子知祥嗣是爲端王恭王五世孫也端王
無子以再從子新璵嗣是爲簡王簡王薨於
萬歷三年姪惠王慎鋤嗣惠王薨子穆王敏
淳嗣穆王薨子由桂嗣自恭王至由桂凡九
世國與明俱亡其系井然無裕王者唯莊王
子竒源未立追謚靖王靖王庶子表謙封新
化王謚恭裕則續志所稱裕王者是簡王老
所稱敬王者是

晉端王妃王氏墓 在岡頭村南原基塚有三周
圍一十有二丈頂高三丈下一丈五尺

晉端王夫人院氏墓 祔妃墓側妃墓表致仕都
御史太原陳鱗撰夫人墓表山西按察副使雲
間陸深撰二碑並存

明兵部侍郎寇天叙墓 在縣西北三里勅葬編

墳戶如制

明御史贈光祿少卿周鈇墓 在縣南西凹之原

明祭酒閻樸墓 在縣西北一里許古城之陽

明京兆尹李敏墓 在中郝村南岡勅葬如制

明尚書褚鈇墓 在縣西南十五里脩文村

明布政使寇陽墓 在天叙墓東南

明贈御史張九河墓 在縣北三里許王胡之陽

國朝布政使桑芸墓 在縣北十五里聶店村南

勅葬如制

榆次縣志

卷七

古蹟

十

使張村古墓 在村西百步許無碑誌相傳甚久

不知何時塚

交古墓 舊志云在藺交半山間穿石爲壙壁

有字皆漫滅內唯咸亨四年歲次癸酉猶彷彿

可識今考在北藺交村西一里許北厓上有石

洞洞中遺像一餘無跡可尋

按舊志以咸亨字遂直爲唐時人墓或者又

且指藺交謂卽其人姓名則愈鑿耳

澤園義塚 舊志云始置在邑壇之西後瘞且

盡明嘉靖中改置北門外半里許民王廷才王才付各捐地三畝爲之其地當聖母廟西其東面南北長七丈西面南北長八丈五尺南面東西廣二十五丈北面東西廣二十七丈五尺計地三畝二分大抵卽向時漏澤園至於六畝爲數不符則歲久侵軼者有之

大東關外正東一里許義塚一南北長三十丈六尺東西廣四丈五尺計地二畝三分

大東關外東南一里許義塚一南北長二十九丈

榆次縣志

卷七

古蹟

十一

六尺南廣二丈北廣一丈五尺計地八分五釐

大西關外正西一里許義塚一北廣十二丈五尺南廣一丈南北長二十二丈計地二畝五分

大西關外西北一里許義塚一南北十四丈北廣十一丈南廣二丈計地一畝五分

榆次縣志卷之七

物產

布 榆人家事紡織成布至多以供衣服租稅之用而專其業者販之四方號榆次大布旁給數郡自太原而北緣邊諸州府皆仰市焉亦貨於京師其布雖織作未極精好而寬於邊幅堅密能久故人咸市之

黃絹 出邢家堡地無蠶桑土人買絲他所而織以爲絹歲出數千匹資以爲生

榆次縣志

卷七

物產

十二

剪子 剪最利者古稱并州杜工部詩猶言之蓋地產鐵性勁於他處而榆次諸工伎唯此獨擅其良今東西聶村及王胡爲剪者大半四方之人往來過此必市之或用爲餉遺

刀 爲小刀七首多出王胡其製稍樸不如京師之工巧快利特勝之市者以餽人與剪畧同

鎖 土人以刀剪之餘治鐵爲鎖甚堅固其售者亦多工用爲常業

葦箔 出要村榆地皆耕耩而要村獨多葦荻伐

而織之爲箔以貿於遠近民衣食所藉給矣
瓜 出東西中三郝村始未有名康熙中

幸晉 巡撫噶禮以進御遂爲著令歲貢瓜由
是榆次瓜名聞天下矣凡貢瓜之法先期巡撫
以銀三十兩賦藝瓜者知縣事者亦賦十金使
爲植藝資及七月巡撫遣官至縣謂之看瓜瓜
熟知縣事者先取瓜呈巡撫曰樣瓜及期瓜盡
落知縣與遣官偕至瓜所謂之起瓜擇尤美而
鉅足備上獻者具車輦貢於京師歲數六百四
十或至八百有奇凡三村所出瓜合之得數萬
計非採貢瓜後雖瓜已熟藝者無敢私一二市
也瓜味極甘脆異他產然瓜以產沙土者爲良
若種近水地則味酸又畏旱復不利灌濯必其
歲雨澤時均瓜味爲美云瓜將熟候獾狸每來
食常爲瓜害藝者勞於防護雖中夜猶時守町
壟間

出訓谷諸村古稱梨美者曰哀家曰大谷皆
在并州訓谷之梨脆爽絕甘稱珍果矣

桃 亦出訓谷諸村民無田者植梨桃爲業桃大
且佳歲收以代稼計所樹一家或數百頭云
編柳以爲器者亦出東郝村東郝多溝常有水其
木宜柳土人廣植之剪其條枝織筐筥之屬大
小隨所用以供擔舁盛弄挈提諸需者一縣取
具焉

物土之宜以爲民利且以表厥品類而著爲
其地之所獨有故志之若乃廣臚周列衆彙
洧陳徒侈食貨之篇有乖縣書之要是以更

舊志而特簡其實也

榆次縣志卷之七

祥異

周景王十一年春石言於晉魏榆

春秋石言於晉魏榆注家未嘗明指爲在此地考晉有離榆亦曰魏榆杜征南云朝歌東有離榆城石言當在其處若六卿分晉時榆地爲魏有因名魏榆則非卽春秋所紀之魏榆蓋在今遼州榆社縣北齊後周因魏榆之舊立梁榆縣是也然唐人送林明府詩引石

榆次縣志

卷七

祥異

十五

言事則已目今之榆次爲魏榆蓋名實相淆而傳稱甚久縣之掌故遂必歸焉故文仍其舊稍爲辨析云

省志舊志皆連載左傳之文而省志尤繁杳惟府志但書石言於晉魏榆爲得記事之法戰國趙惠文王時月生齒嚙畢明年秦伐趙取榆

次

舊志無
今補

晉武帝時鳳凰集於榆次

按晉書武帝紀唯泰始元年二年兩書鳳凰

見於郡國自後但記青龍白龍白麟等見不復言有鳳凰卽鳳凰見亦未明紀其集榆次境也府志作咸寧二年六月省志又作咸寧六年說並不同晉書惟咸寧五年明年改元泰康無咸寧六年也蓋因誤相承未嘗加考今第循舊志之文而紀之

晉元康五年九月烈風傷稼

舊志此條下有永康永嘉咸和等三條以統并州而言不專係榆次故不載

榆次縣志

卷七

祥異

十六

唐天寶十四年二月熒惑太白鬪於畢昴間四月乃伏

舊志無畢昴間正榆次之分故特載之

唐中和元年五月辛酉大風雨土

舊志無今補

宋咸平元年八月榆次民周貴田禾三莖共穗

舊志無府志亦缺今補

元至正二年饑大旱自春至秋不雨人有相食者舊志作至元二年府志作至正考史府志爲

是

元至正十四年八月冀寧路榆次縣桃李花

舊志無

明洪武初夜多野火影中若有人物戲弄之狀

明景泰二年七月十七日甘露降榆次縣學大成

殿前楸樹上是歲大稔

明成化八年七月雨雹傷稼 二十八年八月雨

雹如鷲卵民大饑食草木殆盡

明宏治六年十月地震有聲居民動搖 十年秋

榆次縣志

卷七

祥異

十七

大霖雨積旬縣北孫家山南移二里許 十五

年七月大雨水害稼敗民舍 十八年五月不

雨至於七月苗盡稿米價騰貴

按十七年春旱見省志舊志無至十八年則

省志不載疑省志所書十七年旱卽十八年

事而誤記之不得其詳也

明正德五年四月五日五色雲見是歲庚午秋試

榆諸生舉於鄉者五人 七年六月黑靑見居

人怖恐每夕引刀擊鼓以自防旬餘始止 八

年六月旱已而風雷大作拔樹百餘株 十一
年六月淫雨水出縣西南民俱淪圯無遺 十
三年五月雹害稼

按省志府志十一年事皆作河曲未嘗以爲
榆次也恐舊志所書或誤

明嘉靖元年八月地震者八 十月復震者十三
俱有聲 七年夏旱升米百餘錢餓者相枕
十一月有白氣亘天逾月始散縣東曹火 八
年六月蝗食稼 十五年大稔斗米二十錢

榆次縣志

卷七

祥異

十八

十七年桃李冬華 十九年六月大水 二十
年六月淫雨涂水溢流四十餘里敗田廬 八
月民家生犬耳目各四足有八未幾邊寇入犯
此其應也 二十一年龍起於東城雉堞有烟
痕二十二年夏大疫死者數百人 二十三年
夏六月淫雨壞官舍民廬 二十四年榆城里
民劉廣厚妻一產三男夏好蚘生 八月隕霜
殺稼是冬無雪 二十五年正月城南門災經
夕不熄樓櫓皆空 五月雹如拳殺人畜 六

月有狼羣集於野食小兒至數十人 九月南
關里民趙懷龍妻一產三男 十一月至十二
月木再冰 三十四年十二月地震聲如雷
三十九年大旱無秋人相食 四十年旱甚粟
翔貴民饑死者過半 四十三年大稔銀一錢
易米三斗

明隆慶元年縣人疫相染死十二三 二年秋七
月霧傷稼復雹 五年大稔

明萬歷六年小峪口山上有聲如雷水驟發漂民

榆次縣志

卷七

祥異

十九

舍溺者四十餘人 八年七月涂水漲毀民田
舍 九年正月東三曹火歲大旱疫大行 五
月榆城里迅雷拔木 十年秋七月始雨 十
月無霜晚禾熟 十一年四月內白村朱宦妻
一產三男 十二年五月大雨雹無麥 十三
年多蝗 十四年大旱赤地人餓死 十六年
大稔斗米二十錢 十七年正月雷雨是歲大
稔 二十六年夏好蚘食禾幾盡 二十七年
閏四月三日牛村大雷雨水發民鄭廷豸等男

女二十餘人皆沒畜產溺者百餘是秋八月郝村產芝 二十九年春夏大旱無麥秋禾不藝是歲人大饑 三十五年大有 三十七年四月至秋不雨民饑

明天啟三年正月甲寅縣中晝晦 五年夏不雨禾有收 六年秋隕霜殺草木禾稼

明崇禎十三年旱 十四年六月飛蝗蔽日食禾至盡民大饑相食 十六年三月日午時晝晦

國朝順治三年大稔 二年春二月靈芝生縣中

榆次縣志

卷七

祥異

二十

六年十月七日東門城樓火十一年大疫有一家盡死者始正月至十一月止 十二年四月邑中地震

國朝康熙五年四月邑中地震 七年夏小兒多疹死 八年三月邑中地震 四月十八日雨雪深五寸禾皆死 九月源渦村民段益俊妻產三男 十年邑中地屢震 十三年縣中秀兩岐 十四年八月霖雨二十日 十五年稔 十八年邑中地屢震 十九年冬桃杏

華 二十一年疫 十二年十月地震邑中
有聲 二十三年五月雨雹如拳損麥 二十
六年大有年 二十七年大有年 二十九年
春旱至六月乃雨秋淫雨晚禾不熟多荼民采
食之 三十三年麥秀兩岐 三十四年四月
六日地震邑中井溢 三十六年六月淫雨
八月望雨霜殺草斗米值錢五百六十 四十
三年春淫雨平地出水免租賦 五十一年有
年 五十五年有年 五十九年六月八日邑

榆次縣志

卷七

祥異

二十一

中地震歲旱饑 六十年歲旱饑 六十一年
歲旱饑

國朝雍正元年夏六月始雨晚禾大熟八月桃杏
華 五年四月疫大行 六年鳴李村民劉志
隆妻一產三男春夏旱秋淫雨 十年有年
十一年有年 十三年有年

國朝乾隆元年有年 四年旱 五年有年 十
年秋旱 十一年縣人大疫 十二年旱 十
三年有年 十四年有年 十五年大有年

順治二年芝生續志無採省志補自康熙以
來續志所書彗見白氣起東井五色雲見等
皆不係一邑故概不書

榆次縣志卷之七

事考

春秋智伯圍趙襄子晉陽趙與韓魏共攻智伯

伯敗走趙韓魏追智伯殺之於榆次

戰國趙惠文王十八年秦使蒙驁定太原三年復

攻趙拔榆次新城狼孟等三十七城

省志趙惠文王十八年秦拔榆次三十七城

又云秦莊襄二年拔趙榆次等三十九城乃

一事而複書之史記本莊襄三年省志作二

榆次縣志

卷七

事考

二十三

年史記本三十七城省志作三十九城並誤

舊志作二十七城亦誤

漢高祖七年韓王信反將軍周勃破韓王信還降

太原六城

漢高祖十一年立子恒爲代王都晉陽後復都中

都

後漢延光元年冬鮮卑攻太原鈔破旁縣掠殺百

姓

按史雖無榆次之文然太原六城旁縣則榆

當在其中

劉曜攻晉陽劉琨使張喬拒之戰於武灌喬敗死晉陽太守高錕等皆降琨屯榆次與左右數十騎携妻子奔趙郡遂如常山

按武灌卽武觀在洞渦水側正榆次地灌觀字不同耳又水經注云劉琨爲并州劉淵引兵擊之合戰於洞渦卽劉曜事之誤

唐武德二年劉武周宋金剛引突厥攻太原齊王元吉遣將軍張達以百人禦之達以兵少辭元

榆次縣志

卷七

事考

二十四

吉強之達忿恨引武周襲陷榆次

唐天寶末史思明圍太原分兵破榆次已而攻太原不克思明引去李光弼復之

唐廣德二年僕固懷恩反遣僕固瑒圍榆次其將焦暉等殺之

唐中和元年五月沙陀李克用寇太原節度使鄭從讜遣喻安王蟾踵擊之會振武軍使契苾璋至與沙陀戰克用大敗引去陷陽曲榆次而退省志作李克用與沙陀戰於晉王嶺陷陽曲

榆次而退舊志亦云爾此時克用方率其部
寇唐安得自相戰乎蓋循舊文之誤而不知
其失者

唐光化二年朱全忠伐太原李克用遣氏叔琮自
天井關入破承天軍由遼州至榆次克用大將
周德威逆戰敗叔琮兵於洞渦

宋開寶元年命李繼勳征太原何繼筠爲先鋒部
署至洞渦河與北漢兵遇擊敗之

宋靖康元年金人入寇圍太原攻破旁縣詔种師

榆次縣志

卷七

事考

二十五

中引兵救之師中自井陘進次平定軍乘勝復
壽陽榆次等縣固屯真定宰相許翰責以逗遛
師中不得已進兵抵壽陽之石坑爲金將完顏
活女所襲師中五戰三勝迴趨榆次金人益兵
圍之兵潰師中死之先是制置司叅謀黃友隨
師中軍中兵至榆次十里止舍友曰營地非利
將三面受敵師中不聽已而金兵四合友被執
不降爲金人焚死金攻太原詔制置使种師中
往救兵屯榆次金人以數萬騎迫之隊將張俊

奮擊金兵殺傷甚衆俊請乘勝要戰師中以日不利意令退保金合圍意攻榆次破師中死之俊帥所部突圍出且行且戰至烏河川與敵遇復斬五百級

按師中戰死一事而史文互異如云榆次破師中死之則似師中守城中不在殺熊嶺矣此傳聞異辭因而誤記者當以師中傳爲正金興定元年元兵攻太原府下之金晉陽公郭文振署趙益爲壽陽令駐兵榆次重原寨遂帥衆

榆次縣志

卷七

事考

二十六

收復太原

金元光二年時元兵復取太原金人來爭攻壽陽縣王胡莊垂破元都元帥哈刺拔都夜半引甲士十餘人救之天將明金人遁去

按王胡今榆次地云攻壽陽王胡恐史誤元至正十九年正月秦不花潰兵數萬鈔掠山西察罕帖木兒遣陳秉直分兵駐榆次招撫之

明洪武元年大將軍徐達等自北平引兵欲定山西聞元將擴廓帖木兒出雁門將攻保安遂乘

虛竟擣太原兵至榆次等縣皆迎降

明正德六年流賊楊虎等引衆掠平陽澤潞諸地
至榆次縣南三十里揚言徃井陘忽東抵遼州
遁去

明嘉靖二十年俺答寇邊犯太原列帳城下遂縱
掠至榆次

明嘉靖二十一年九月俺答復自廣武入犯太原
掠榆次西境至沁潞而還

明崇禎九年山陝流賊至榆次溝口諸村知縣任

榆次縣志

卷七

事考

二十七

濬率鄉勇逆擊之斬獲頗多賊乃退

明崇禎甲申五月賊李自成自京師敗歸山西榆
次人逐自成前所署僞尹蕭恒閉城拒守賊怒
攻城破之殺數千人屠戮甚慘榆次縉紳多避
亂東南山谷中賊搜捕得之纍繫其妻子以往
關中御史張養僉事左應選同知霍俊士等皆
與焉至明年乙酉 王師平陝西始得釋還

國朝順治五年大同總兵姜瓖反賊黨已破交城
太谷遂攻榆次知縣楊三知力禦之守者六月

賊知不能拔乃退

榆次縣志

卷七

事考

二十八